

Ministry of Finance, Economic Planning and Trade  
GOS Economic Reform Programme with IMF Support  
Statement  
National Assembly Seychelles

Minister Naadir Hassan  
Wednesday 07<sup>th</sup> July 2021

Mersi Msye Spiker,  
Msye Spiker  
Tou bann Manm Onorab  
Tou bann manm piblik a lekout  
Bonn a premidi

Msye Spiker, parey mon ti anonse dan Diskour Bidze 2021 an Fevriye, e osi a plizyer repriz dan Lasanble e osi dan medya, lekonomi Sesel e sityiasyon finans pei i kritik.

Ler mon ti pran ansarz Minister Finans, nou nivo det ti'n fini ariv en nivo ki pa soutenab e kont gouvènmman tinn preski zero.

Enn bann lenpak sa Pandemik Covid 19 lo lekonomi, se son lefe 'terib' lo nou lendistri tourizm, kot reveni pei tinn redwir par en gran kantite. Avek sa bann mezir pou sipòrt saler dan sekter prive, bann depans lasante pou zer sa Pandemik e bann depans sosyal in fer ki sa in ogmant depans gouvènmman, e fer nou anrezistre en defisit primer rikord, pres 20% GDP. Gouvènmman ti pret larzan lo marse finansyer domestik pou kapab fer sa bann depans. 'Loan' lo marse finansyer domestik i vremen ser. E sa, in fer ki nou det ti sorti 62% nou GDP pou ariv pres 100% an Desann 2020.

Msye Spiker, pour 2021, bann mezir bidzeter kin ganny pran in ede pou redwir sa defisit fiskal. Desizyon pou re ouver pei in fer ki noun kapab anmas plis reveni atraver taks anvè ki aktivite ekonomik kinn rebran Dousman Dousman. Re ouvertir nou lekonomi in osi fer ki nou to lesanz in apresye en bon pe, sorti 22 rounpi pou en Dolar pou ariv preski 16 rounpi en Dolar. Sa i vèdir ki la kantite ki nou dwa konpare avek nou 'GDP' in desann pou ariv 84%.

E la, mon a pran sa lokazyon pou dir avek bann marsan, “pri komodite pa kapab zis monte ler pri dolar i monte, me ler dolar i desann par pres 6 roupi, pri komodite pa desann”. Sa pa byen ditou, Msye Spiker. Annou mazine ki dan en kriz ekonomik tou sekter i annan en rol pou zwe.

Me kantmenm sa amelyorasyon, nou sitiasyon i ankor kritik. Dapre bann prediksyon ki bann ekonomis Minister Finans e IMF in fer, nou det i ankor pa soutenab.

E osi, dapre bann prediksyon kantite larzan ki gouvènmàn I bezwen pou fer marse pei, ti pou nepli annan disi 4 enm kar sa lannen. Rezon pour sa, se ki parey nou ti anonse dan bidze 2021, gouvènmàn i ankor pe fer en defisit sibstansyel. Savedir i ankor pe depans plis ki i pe anmase. E abilite pou prete lo marse finansyer domestik in redwir akòz sa resours pa egziste la, e son pri i tro o.

Sa sitiasyon i enn ki nou tinn prevwar, depi Desann lannen pase, e se sa akòz mon ti anonse ki gouvènmàn tinn apros IMF pou en program reform ekonomik avek son sipor finansyer.

Me parey tou antite ler i pret ou larzan i met bann term ek kondisyon pou li pret ou.

Msye Spiker, sa negosyasyon avek IMF, in enn kin tre difisil, konplike e long. La, mon ti a kontan remersi sa tim zenn profesyonel kot Minister Finans ek Labank Santral ki pandan plis ki 6 mwan, zot in sakrifye bokou, sirtou zot lavi personel pou fer bann travay pou kapab ganny en program pou ede sov nou pei. Sesel ek lepep Seselwa i dwa zot en gro mersi. E

mwan Msye Spiker, mon dir sa lekip zenn profesyonel Seselwa mersi bokou pour zot travay, ki si i ganny enplimante byen pou sov nou pei.

Msye Spiker, les mon eksplike akoz sa negosyasyon in enn ki tre long, difisil e konplike.

Parey monn dir pli boner, sitiasyon nou lekonomi e nou finans pa ti bon ditou. E bann mezir ki nou ti pou bezwen pran ti pou sever. Alors sa gouvernman ek sa lekip teknisyen in bezwen diskit en program ki nou pou kapab soutenir san fer tro bokou dimal nou pep. Me osi donn konfor IMF ek son bann partener ki nou serye pou anmenn nou finans e nou det lo en semen ki soutenab.

Apré plizyer mwan diskisyon noun finalman ariv lo en lagreman pou nou ganny en program IMF ki apel en Extended Fund Facility (EFF). I pa premye fwa ki nou antre lo enn sa program, me sel diferans, i ki sa voyaz nou sitiasyon i pli kritik. Monn deza dir oparavan, e mon pou repet ankor - sitiasyon ekonomik ek finansyel pei an 2021 i bokou diferan avek 2008.

Les mon koz enpe lo ki bann kondisyon ki noun bezwen agree lo la pou nou kapab ganny sipor IMF ek son bann partener.

Premyerman, nou oblize etablir en defisit bidzeter maximum ki nou kapab fer, e “nou napa dwa depase”, e apre 2023 ki sirplis bidzeter minimum ki nou bezwen fer. Sa i ava asire ki nou sitiasyon det i revinn lo en semen soutenab par 2026. Savedir nou poursantaz det konpare avek GDP pou bezwen

sorti 84% pou vinn anba 70% par 2026. Sa i pou en task ase signifikan ler nou pran kont sitiasyon ozordi.

I annan de fason ki nou pou bezwen fer pour nou kapab ariv lo sa bann target:

Enn - se redwir nou depans konsirableman e

Dezyenm - nou pou bezwen ogmant reveni par ogmant aktivite ekonomik e osi vinn pli efikas lo koleksyon taks.

Lo kote ogmant reveni, gouvènmàn in fini anons son plan diversifikasyon ekonomik e sa in fini konmans. Nou bezwen vinn en destinasyon ki pli atiran pour investiser. E la mon pe koz investiser domestik ek etranze. I ankor tro difisil pou fer biznes Sesel.

Minister Finans an kolaborasyon avek Minister Lenvestisman pe al etabli en 'Forum Ekonomik' konzwentman avek sekter prive pour nou imedyatman konmans adres bann defi ki annan avek fer biznes sesel.

Gouvènmàn osi pe al akseler son zefor pou vinn pli efikas dan koleksyon taks. I annan ankor tro bokou biznes ki pa pe fer zot kontribisyon taks parey zot devret. Demars in fini konmans pou ogmant kapasite SRC pou odit bann lakonpanyen. Bann lalwa pe ganny amande pou asire ki bann defayans ki ekziste i ganny eliminen. Kot Ladwann, i annan tro bokou reveni ki pa pe ganny anmans akòz i annan serten ki pa travay ek lentegrite. Sa osi pou bezwen ganny arete. Gouvènmàn pe travay lo tousala pou asire ki tou taks ki devret ganny kolekte i ganny kolekte.

In osi ler pou nou fer en evalyasyon lo nou rezim taks VAT. Kestyon ki nou pe demande eski rezim VAT dan fason ki i

marse ozordi i sa meyer pour nou pei? Avek led ki nou pou gannyen, nou pou fer en letid pou regarde si nou pou kontinyen avek en sistenm VAT, ouswa nou pou annan en sistenm pli senp (GST at the point of entry dan pei) ouswa en VAT pli senp. Dan sa bann mwan ki pe vini sa evalyasyon pou ganny fer.

Lo kote depans, l pou ananan mwens resours finansyer, aköz gouvènmàn pou bezwen konmans pey sa bann det ki in pran.

Me Gouvènmàn pou bezwen kontinyen delivre avek mwens resours finansyer.

An dot mo ‘Nou bezwen fer plis avek mwens’. Servis Piblik i bezwen vinn pli efikas e pli prodiktiv.

Gouvènmàn pou entansifye son zefor pou anmenn sa ki nou apel ‘Results Based Management’ dan servis piblik. Ki savedir sa? Savedir gouvènmàn e tou son minister, departman ek lazans, pou bezwen annan en plan stratezik pour li ganny en bidze. Nou nepli kapab prepar en bidze san annan en stratezi. Pou bezwen annan sirveyans apropriye pou regarde ki sa resours finansyer kinn ganny donner pe ganny depanse byen e pe atenn son lobzektiv. E i bezwen annan en bon ‘Performance Management Framework’ ki fer travayer sekter piblik etabli zot lobzektiv e apre ganny evalye pou asire ki zot in atenn zot target. Sa sistenm evalyasyon ki la ozordi, pa pe marse, e si nou anvi ki nou akonplir nou lobzektiv nou bezwen fer reform dan servis piblik

Msye Spiker, Ozordi nou bil saler dan servis piblik i senpleman tro o. Avek reform 2008, nou ti sipoze annan en

target kot total saler ki gouvènmàn i peye dan servis piblik ti dwatet ant 7/8% nou GDP. Pour nou arive tonm lo sa target, nou tin devret redwir groser servis piblik. Me sa travay ti zis lo konmansman sa reform, akòz apre nou n'war en servis piblik kin kontinyen grosi e in ariv preski 13% nou GDP. Sa i senpleman pa soutenab.

Savedir nou pou bezwen fer reform dan servis piblik. Avek reform pou entrodwir plis teknolozi dan landrwa travay sa pou anmenn plis efikasite dan fonksyonnmàn gouvènmàn e avek sistèm RBM pou osi annan plis prodiktivite. A lon term, nou pou bezwen en servis piblik ki pli pti, me pli efikas.

Me, gouvènmàn i konsyan ki nou lekonomi pa ankò ariv a 100%, alò in negosye tre fortman avek IMF, ki sa reform i ganny fer an staz. Savedir, ler ki nou lekonomi i agrandir e lanplwa i ganny kree dan sekter prive, servis piblik a son tour pou bezwen redwir son groser, e bann travayer a ganny en lanplwa dan sekter prive. Sa pou ganny fer dan en fason an ord.

Msye Spiker, enn bann size ki lo latab pou plizyer letan se size Air Seychelles. E parey ti ekspekte, IMF in osi met en kondisyon ki gouvènmàn i bezwen asire ki, Air Seychelles, pa vinn en risk fiskal. Bann diferan analiz kinn ganny fer ziska prezan, in montre ki Air Seychelles parey i ete la, pa pou soutenab. E det ki Air Seychelles i annan i en tro gro risk pou gouvènmàn e tax payers. Alò, enn bann kondisyon ki IMF i met devan se ki gouvènmàn pou bezwen pran lapros ki pli efektif pou redwir sa bann risk. Osì IMF ek bann lezot

partener pa pou donn larzan gouvènmàn si Air Seychelles i kontinyen reste en risk lo gouvènmàn.

Zot a rapel ki an Zen gouvènmàn ti etabli en komite ki son bi prensipal se pou evalye tou laspe biznes, ek finansyel Air Seychelles. Sa komite pe deza fer sa travay. Pour le moman sa ki mon kapab dir se ki tou opsyon i lo latab pour gouvènmàn konsidere. Avan Septanm 2021, sa pou ganny soumet avek Kabinet.

En lot landrwa ki pa soutenab se lo nou pansyon e benefis retret oubyen sa ki laplipar nou i apel Sekirite Sosyal. Si nou kontinyen lo sa menm laliny, mazorite nou popilasyon ozordi pa pou ganny en pansyon ler zot pran zot retret. Lo kote benefis retret oubyen sekirite sosyal, nou bezwen reform akòz avek nou pousantaz popilasyon ki pe viv pli lontan, bidze gouvènmàn pa pou vinn soutenab.

Enn bann premye aksyon se nou pou bezwen ogmant laz retret, sorti 63 an pou vinn 65 an. Sa ogmantasyon dan laz retret i en propozisyon kin la depi en bon pe letan.

Me anmenmtan nou annan plizyer formil ki nou ankor pe analize pou permet pran retret pli boner me avek en pousantaz redwir lo pansyon.

Lo kote benefis retret oubyen sekirite sosyal, Minister Finans i ankor pe travay lo en kad legal ki pou permet bann ki mwen fortinen pou benefisyè avek benefis retret e bann ki reveni i pli o ler zot pran zot retret zot a ganny zis en pousantaz sa benefis. Sa i permet gouvènmàn pou kontinyen sipòrt bann ki pli bezwen e anmenmtan i ava osi permet ki bidze i vinn soutenab.



Msye Spiker, la ankor mon bezwen fer li tre kler ki i pa form parti sa reform pou koup okenn benefis sosyal ki ekziste konmela. An efe gouvènmàn in donn son komitman pou depans lo bann program sosyal.

Msye spiker, i annan ankor plizyer bann mezir ki Minister Finans pou eksplike dan bann zour e semenn ki pe vini.

Avek sa, mon ti a kontan, lans en lapel avek tou Seselwa ki i enportan ki zot pran vaksen kont COVID 19. Nou lekonomi ek sitiasyon finansyel nou pei pou selman kapab refer, ler nou tou nou fer nou par pou redwir to lenfeksyon sa viris dan pei.

Parey Minister Lasante in fer resorti to lenfeksyon i ankor tro o, ki fer ki nou pei pe ganny mete lo bann lalis rouz, par bann pei ki nou marse tradisyonel touris. Nou pti pei Sesel pa kapab aforb pou ganny mete lo lalis rouz.

Alor tou Seselwa, silvouple vin pran zot vaksen, ki pou ed nou pei sorti pli vit dan sa kriz ekonomik ek finansyel ki i ladan.

Msye Spiker, mon osi fer en lapel avek bann dirizan dan pei, pou siport sa program ki nou pe al ladan.

Ozordi i pa ler pou fer politik. Eleksyon pou an 2025, pou annan letan pou fer politik. Ozordi Sesel i bezwen tou son zanfàn pou ed li. Sa reform pou enpakte lo nou tou. Lo lot kote si nou pa fer li, i pou osi enpakte ankor plis lo nou tou.

In napa en letan dan nou listwar ki nesisit plis linite nasyonan ki ozordi. Se fitir nou pei e nou zanfàn ki nou bezwen fer sir ki

nou pei i sirviv sa kriz ki nou pei in tonm ladan. Sa desizyon ki nou pran ozordi, pou determinen ki kalite Sesel nou pou war demen.

Si nou pa pran aksyon la, nou pou pey lekonsekans demen. Pa zis nou, me nou zanfan. Savedir i tonm lo nou, sa zenerasyon ozordi pou fer sa ki bezwen ganny fer, pour ki nou annan en meyer lavenir. Nou bezwen konmans kwar dan fitir Sesel. Sakrifis ki nou fer ozordi, son rezilta nou pep pou war dan fitir.

Seselwa, nou konsyan ki ankor ennfwa OU pe ganny demande pou fer sakrifis. Nou rekonnet e apresye sa zefor ki OU fer toultan.

Mon oule asir OU, ki sa gouvernman pa ti poun zanmen vin demann avek OU pou fer ankor sakrifis, si nou sitiasyon pa ti kritik.

Sa gouvernman in toultan promet OU ki i pou toultan vin koz laverite. Sanmenm sa mon pe dir avek OU ki sa semen ki nou pe al pran i enn ki pou dir e difisil, me nou napa swa. Noun war nou dan en sitiastion ki zanmen noun war dan nou listwar.

Alor, mon fer lapel avek tou Seselwa annou pa fel nou pei, Sesel, e son zenerasyon ki pou vini demen.

Mersi Msye Spiker.